



Broj: 04-40-1-25/26
Sarajevo, 26.01.2026. godine

Na osnovu dobivenih i obrađenih informacija od: općinskih operativnih centara civilne zaštite, Federalnog hidrometeorološkog zavoda, JU Zavoda za hitnu medicinsku pomoć Kantona Sarajevo, JU Zavod za javno zdravstvo Kantona Sarajevo, MUP-a Kantona Sarajevo, BIHAMK-a i drugih struktura zaštite i spašavanja formiranih na području Kantona Sarajevo, dojava građana, a u skladu sa članom 152. Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, br. 39/03, 22/06 i 43/10) i čl. 14., 17. i 19. Pravilnika o organiziranju i funkcioniranju operativnih centara civilne zaštite („Službene novine Federacije BiH“, broj 9/19) dostavljamo Vam:

REDOVNI IZVJEŠTAJ
za period od 08:30 sati 25.01.2026. do 08:30 sati 26.01.2026. godine

Ministarstvo komunalne privrede, infrastrukture, prostornog uređenja, građenja i zaštite okoliša, zbog poboljšanja kvaliteta zraka u Kantonu Sarajevo ukinulo je, dana 25.01.2026. godine, epizodu „Upozorenje“ za cijelo područje Kantona Sarajevo.

Kantonalna uprava civilne zaštite Kantona Sarajevo: Pripadnici Profesionalne vatrogasne jedinice Kantonalne uprave civilne zaštite Kantona Sarajevo u izvještajnom periodu imali su 8 intervencija: gašenje dimnjaka na stambenom objektu, gašenje kontejnera sa smećem, gašenje elektroinstalacija u stanu, tri tehničke intervencije (evakuacija iz poplavljenog automobila, ispumpavanje vode iz poplavljenog prostora i otvaranje zaglavljenih vrata) i dva obezbjeđenja pretakanja goriva na Aerodromu.

Općinski operativni centar civilne zaštite Stari Grad: U skladu sa naredbama Štaba civilne zaštite Kantona Sarajevo, Općinski štab civilne zaštite Stari Grad organizovao je 24-satno osmatranje (monitoring) terena na ugroženim područjima od klizišta, lokalitetima Curine njive, Knjeginjac i Bistrički potok (teritorija Općine Stari Grad Sarajevo i Opštine Istočni Stari Grad), te kontinuiranu analizu i procjenu stanja na ugroženom području u cilju osiguranja provođenja pravovremenih mjera zaštite stanovništva (pravovremenog upozoravanja i evakuacije stanovništva, ukoliko to situacija bude zahtijevala) i materijalnih dobara. Uposlenici Službe civilne zaštite Općine Stari Grad Sarajevo, na osnovu zadataka zaštite i spašavanja, dana 25.01.2026.godine, izvršili su obilazak i osmatranje terena na lokalitetima Curine njive, Knjeginjac i Bistrički potok. Cilj obilaska bila je procjena trenutnog stanja terena te identifikacija potencijalnih rizika.

Vizualnim pregledom lokaliteta klizišta tokom dana i noći utvrđeno je da je u popodnevnim satima zabilježen pojačan dotok vode uslijed otapanja snijega. Tokom noći, uslijed novih padavina, došlo je do dodatnog povećanja dotoka vode na tlu klizišta, pri čemu su na pojedinim dijelovima formirane plavne površine. Drenažni kanal je u većoj mjeri oštećen, gdje je voda isprala i potisnula drenažni materijal iz kanala, zbog čega se na oderđenim dionicama voda izlijeva iz drenažnog sistema. Na dijelu ispod igrališta evidentno je slijevanje vode prema prvim stambenim objektima, uz prisutne nanose blata i zemljanog materijala.

Lokalitet Knjeginac: Na lokalitetu deponije u rigolu iznad ceste vidljiva je povećana količina vode, kao i u donjem dijelu deponije gdje se konturirano zadržavaju plavne površine, uz proticanje potoka prema lokalitetu klizišta. Tokom noćnih sati došlo je do plavljenja pojedinih stambenih objekata u ulicama Močila i Bistrik. U ulici Močila u jednom stambenom objektu evidentirano je pucanje podne ploče u unutrašnjosti objekta, uz izviranje vode. U ulici Bistrik zabilježeno je izbijanje vode iz odvoda u kupatilu.

Bistrički potok: U ulici Sulejmana Zolja došlo je do izlivanja Čolinog potoka iznad stambenog objekta, uslijed začepljenja rešetke. Uposlenici općinske službe izašli su na teren i izvršili čišćenje rešetke, čime je u značajnoj mjeri ublaženo izlivanje potoka. Na lokalitetu Mošćanice evidentirano je izlivanje potoka na cestu, pri čemu je postojala opasnost od plavljenja više stambenih objekata. Na lokalitetu Bistričkog potoka vizualnim pregledom ustanovljeno je da je došlo do pojačanog protoka vode u koritu, ali bez evidentiranih prepreka i zastoja u protoku. Iz kaptiranog izvora pored mosta na Boguševcu zabilježeno je manje izlivanje vode iz kaptaze na cestu, bez ugrožavanja saobraćaja u tom trenutku.

Općinski operativni centar civilne zaštite Ilidža: Zbog obilnih kišnih padavina i topljenja snijega došlo je do porasta vodostaja na svim vodotocima na području Ilidže. Vreće sa pijeskom su postavljene u ulicama Plantaže, Kovačevac, Rakovička cesta, Mratnjevača, Tvornička, Mliništa, Hendekusa, Mekote, Osik, Drage Filipovića i Vlakovokako bi se spriječilo plavljenje objekata. Ekipe CZ Općine Ilidža i pripadnici JP Ilidža i VD Ilidža su tokom noći bile na terenu i koordinirale potrebne intervencije da ne bi došlo do ugrožavanja građana i materijalnih dobara.

Općinski operativni centar civilne zaštite Novo Sarajevo: Zaprimljen je veliki broj poziva građana zbog začepljenih odvoda i slivnika, te su ekipe Vatrogasnog društva Novo Sarajevo 19345 izlazile na teren po prijavama. Na lokaciji u ulici Čamila Sijarića broj 10 zabilježeno je veće začepljenje. Na lice mjesta izašla ekipa KJKP Vodovod i kanalizacija, koja je uz pomoć specijaliziranog vozila WOMA izvršila pročepljenje odvoda.

Općinski operativni centar civilne zaštite Vogošća: Obilne padavine i topljenje snijega u toku prethodne noći dovele su do izlivanja potoka i pojave bujičnih voda na više mjesta. U naselju Hotonj bujični potok je prijetio stambenim objektima. U ulici Jošanica I, kao i u ulici Barica i na spoju ulica Igmanska i Ahmeda Rizve, na početku ulice Blagovac I došlo je do izlivanja potoka. Rijeka Bosna se izlila u dijelu ulice Lug u MZ Svake i u dijelu ulice Stara željeznička stanica. Ekipe civilne zaštite i angažovana mehanizacija su vršili pročišćavanje odvodnih kanala i slivnika. Tokom noći došlo je do nestanka električne struje na većem dijelu općine Vogošća. Iz trafo stanica je ispumpana voda i otklonjena većina kvarova, tako da je stanje sa strujom uglavnom normalizovano. Rijeka Vogošća, Ljubina i Jošanički potok ostali su u svojim koritima.

Općinski operativni centar civilne zaštite Novi Grad: U toku noći u industrijskoj zoni u Rajlovcu izlila se rijeka Bosna i poplavila dvorišta nekoliko pravnih lica. Ekipe CZ su na terenu i još uvijek rade na ispumpavanju vode. Voda se postepeno povlači.

Općinski operativni centar civilne zaštite Ilijaš: Ekipe CZ u toku noći u naselju Bioča intervenisale na pročišćavanju začepljenih odvoda, dok su u Kadarićima angažovali na sprječavanju plavljenja pristupnog puta puta Bosna. Trenutno rade na raščišćavanju puta u Srednjem.

Općinski operativni centar civilne zaštite Hadžići: Pripadnici CZ su na nekoliko mjesta intervenisali na raščišćavanju začepljenih odvoda.

KJKP Sarajevogas: Svi potrošači u Kantonu Sarajevo su uredno snabdjeveni prirodnim gasom.

KJKP Vodovod i kanalizacija: Vodosnabdijevanje u Kantonu Sarajevo je uredno, osim u dijelovima pojedinih naselja gdje se vrše planske popravke kvarova na vodovodnoj mreži.

Federalni hidrometeorološki zavod: Jutros u 08:00 sati temperatura u Sarajevu na mjernoj stanici Vijećnica iznosila je 3°C, vlažnost zraka 97%, barometarski pritisak 941 hPa.

BIHAMK: Saobraćaj se na području Kantonu Sarajevo odvija uredno, osim na dionicama gdje se izvode planirani radovi na kojima se saobraćaj odvija po posebnom režimu.

Prema informacijama prikupljenih od dežurnih dispečera i informativnih službi KJKP GRAS, Centrotrans – Eurolines d.d. i JP Željeznice Federacije BiH, gradski, međugradski i željeznički saobraćaj se odvijaju po redu vožnje.

PO OVLAŠTENJU DIREKTORA
ŠEF CENTRA

Fahrudin Pribišić

Dostavljeno:

- Predsjedavajućem Skupštine Kantona Sarajevo
- Premijeru Kantona Sarajevo
- Direktor KUCZ Kantona Sarajevo
- Komandantu Štaba CZ Kantona Sarajevo
- Federalnom operativnom centru civilne zaštite
- a/a